

Государств өгчэх ссудиг

цугтнь хурдар олзлх кергтә

Эврәннь төрскн газрур хәрү ирджәх хальмгудт гер бәрдж авхд болн үкр хулддж авхд ссуд өгтхә гидж, 30 сай арслнъ хальмг танъгъчд Правительствин шиидврәр өггддженә.

Хальмг танъгъчин куч-көлсчнрин депутатнрин Советин кучагч комитет апрель сарин 20-д гаргъсн шиидврәри, эн мөнъгиг райод болгънур ховадж гаргъв. Танъгъчин кучагч комитет эн шиидврәри эн ссудин тускар совхозмудар, колхозмудар, МТС, МЖС болн нань чигн предприятъсар нег өдрин дунд занъглтхә гидж райодин кучагч комитетст даалгъла.

Болв, ода күртл зәрм райодин кучагч комитетс (Черноземельск, Приозерн) колхозмудин, совхозмудин гардачнрт занъгләд уга, нам эврәннь шиидврмүдән чигн комбанкд орулдж өгәд уга.

Приютненск, Целинн райодин болн Элст балгъсна колхозмудин, совхозмудин гардачнр, хәрү газрури ирцхәсн хальмгудт гер бәрх болн мал

хулддж авх ссуд авч өгхин тускар амрсн кәдлмш кеджәцхәхш. Хәрдж ирджәх хальмгуд бәәх гер уга бәәтл, гер бәрхд гаргъгдсн мөнъгиг эс олзллгън — сән йовдл биш. Иигәд унджара бәәтл тосхлтин материалмуд белддж зөөдж авх цаг өнъгрдж одхми болджана.

Гер бәрх хальмгудт ссуд авч өглгъәр зугл ганцхи Буратинск совхоз (директорнъ үр Мухаринов А.) сән улгүр үзүлджәнә. Танъгъчд түрүн болдж эн совхоз амтнд цәәлгъвр кегәәд гер бәрх, мал хулддж авх улсин материалмуд белдәд банкас ссуд авчана. Буратинск совхоз ссуд авад, үкрмүд хулддж авад, ирсн хальмгудт түгәдж өгв.

Ахр цагин эргцд хальмгудт өгчәх ссудин тускар цәәлгъвр кедж, гермүд бәрх, малмуд хулддж авх улст дөнъ-нөкд болдж, государствас гаргъдж өгсн мөнъгиг цагтнь олзлх кергтә.

В. НЕМБРИКОВ.

Селәнә эдл-ахун банкин Хальмг танъгъчин конторин кредити ах инспектор.